

Na osnovu člana 8. i 23. Zakona o ministarstvima i drugim organima uprave Tuzlanskog kantona - prečišćeni tekst ("Službene novine Tuzlanskog kantona", broj: 10/18, 5/24 i 10/25) i člana 160. stav (2) Zakona o srednjem obrazovanju i odgoju - prečišćeni tekst („Službene novine Tuzlanskog kantona”, br. 10/20, 11/20, 8/21, 11/21, 22/21, 5/22, 6/22 – presuda US FBiH, 10/22, 11/22, 9/23, 12/23, 5/25 i 18/25), ministar obrazovanja i nauke Tuzlanskog kantona, donosi

O D L U K U

o utvrđivanju uslova, kriterija, postupka i načina isplate za dodjelu stipendija posebno nadarenim redovnim učenicima srednjih škola na području Tuzlanskog kantona u školskoj 2026/2027. godini

I - OPĆE ODREDBE

Član 1.

(Predmet)

Ovom odlukom utvrđuju se uslovi, kriteriji i postupak za dodjelu stipendija u školskoj 2026/2027. godini, posebno nadarenim redovnim učenicima srednjih škola na području Tuzlanskog kantona, te način isplate finansijskih sredstava.

Član 2.

(Korisnici prava)

(1) Po ovoj odluci dodjeljuju se stipendije za posebno nadarene redovne učenike srednje škole i stipendije za posebno nadarene redovne učenike srednje škole koji pohađaju srednju umjetničku školu.

(2) Pravo na dodjelu stipendije za posebno nadarene redovne učenike srednje škole imaju posebno nadareni redovni učenici srednjih škola na području Tuzlanskog kantona koji su ostvarili rezultate po sljedećim ostvarenjima: opći uspjeh postignut u prethodnoj školskoj godini u smislu završenog razreda osnovne ili srednje škole, uspjeh na takmičenjima iz predmeta iz nastavnog plana i programa i uspjeh na takmičenjima iz drugih oblasti u smislu člana 12. stav (1) ove odluke, koji se obrazuju i redovno pohađaju srednju školu na području Tuzlanskog kantona u školskoj 2026/2027. godini (u daljem tekstu: kandidat).

(3) Pravo na dodjelu stipendije za posebno nadarene redovne učenike srednje škole koji pohađaju srednju umjetničku školu imaju posebno nadareni redovni učenici srednjih škola koji pohađaju i srednju umjetničku školu ili pak posebno nadareni redovni učenici srednjih umjetničkih škola na području Tuzlanskog kantona koji su ostvarili rezultate po sljedećim ostvarenjima: opći uspjeh postignut u prethodnoj školskoj godini u smislu završenog razreda srednje/srednje umjetničke škole, uspjeh na takmičenjima iz predmeta iz nastavnog plana i programa srednje umjetničke škole, uspjeh na takmičenjima iz oblasti umjetnosti, a koji se obrazuju i redovno pohađaju srednju školu i srednju umjetničku školu ili pak samo srednju umjetničku školu na području Tuzlanskog kantona u školskoj 2026/2027. godini (u daljem tekstu: kandidat).

(4) Pravo na dodjelu stipendije po ovoj odluci ne mogu ostvariti redovni učenici koji su ostvarili rezultate samo po osnovu općeg uspjeha postignutog u prethodnoj školskoj godini bez ostvarenih rezultata po nekom od drugih kriterija.

Član 3.

(Finansijska sredstva)

Finansijska sredstva za dodjelu stipendija osigurana su u Budžetu Tuzlanskog kantona za 2026. godinu na potrošačkoj jedinici 24010018 – Ministarstvo obrazovanja i nauke, Stipendiranje posebno nadarenih učenika osnovnih škola, ekonomski kod 614200 – tekući transferi pojedincima, OCD206 – Stipendiranje posebno nadarenih učenika srednjih škola.

Član 4.
(Visina stipendije)

(1) Ukupna visina stipendije, po jednom kandidatu, u skladu sa odredbama ove odluke iznosi 1.350,00 KM (slovima: hiljadutristotinepedeset konvertibilnih maraka).

(2) Isplata stipendije vršit će se u najviše četiri jednake mjesečne rate, a visina jedne rate iznosi najmanje 337,50 KM (slovima: tristotinetridesetsedam konvertibilnih maraka i 50/100).

Član 5.
(Ukupan broj korisnika stipendije)

(1) Pravo na stipendiju po ovoj odluci može se odobriti za ukupno 96 kandidata u školskoj 2026/2027. godini, i to za 76 kandidata za stipendije za posebno nadarene redovne učenike srednje škole te za 20 kandidata za stipendije za posebno nadarene redovne učenike srednje škole koji pohađaju i srednju umjetničku školu odnosno posebno nadarene redovne učenike srednje umjetničke škole.

(2) Izuzetno, pravo na stipendiju može se odobriti i za veći broj kandidata od broja utvrđenog u stavu (1) ovog člana ukoliko na rang listama veći broj kandidata ima isti broj bodova te nije moguće utvrditi prednost u skladu sa članom 13. ove odluke, i to isključivo ako sredstva za dodatno stipendiranje bude moguće obezbjediti u okviru sredstava planiranih u Budžetu Tuzlanskog kantona za stipendiranje nadarenih učenika i studenata.

II - USLOVI I KRITERIJI ZA DODJELU STIPENDIJA

Član 6.
(Uslovi za dodjelu stipendije)

Pravo na dodjelu stipendije ima kandidat pod uslovom:

- a) da je državljanin Bosne i Hercegovine,
- b) da je redovan učenik srednje škole na području Tuzlanskog kantona u školskoj 2026/2027. godini, te i/ili redovan učenik srednje umjetničke škole na području Tuzlanskog kantona u školskoj 2026/2027. godini, ukoliko se radi o kandidatu iz člana 2. stav (3) ove odluke,
- c) da je ostvario opći uspjeh sa prosječnom ocjenom najmanje 4,80 u prethodno završenom razredu osnovne ili srednje škole, i/ili da je ostvario opći uspjeh sa prosječnom ocjenom najmanje 4,50 u prethodno završenom razredu paralelne osnovne škole ili srednje umjetničke škole, ukoliko se radi o kandidatu iz člana 2. stav (3) ove odluke,
- d) da ne koristi ili nije dobitnik neke druge stipendije čiji je izvor finansiranja Budžet Tuzlanskog kantona i
- e) da je ostvario rezultate po nekom od drugih kriterija iz člana 7. stav (1) tačke b) i c) odnosno stav (2) tačke c) i d) ove odluke.

Član 7.
(Kriteriji za dodjelu stipendija)

(1) Rangiranje kandidata, posebno nadarenih redovnih učenika srednje škole, za dodjelu stipendije vrši se na osnovu sljedećih kriterija:

- a) opći uspjeh postignut u prethodnoj školskoj godini u smislu završenog razreda osnovne ili srednje škole,
- b) uspjeh na takmičenjima iz oblasti predmeta iz nastavnog plana i programa u prethodnoj školskoj godini,
- c) uspjeh na takmičenjima iz drugih oblasti u smislu člana 12. stav (1) ove odluke u prethodnoj školskoj godini.

(2) Rangiranje kandidata, posebno nadarenih redovnih učenika srednje škole koji pohađaju i srednju umjetničku školu odnosno posebno nadarenih redovnih učenika koji pohađaju samo srednju umjetničku školu, za dodjelu stipendije vrši se na osnovu sljedećih kriterija:

- a) opći uspjeh postignut u prethodnoj školskoj godini u smislu završenog razreda osnovne ili

srednje škole (ukoliko kandidat pohađa i neku drugu srednju školu pored srednje umjetničke škole),

b) opći uspjeh ostvaren u prethodnoj školskoj godini u smislu završenog razreda paralelne muzičke škole ili srednje umjetničke škole,

c) uspjeh na takmičenjima iz oblasti predmeta iz nastavnog plana i programa umjetničke škole u prethodnoj školskoj godini,

d) uspjeh na takmičenjima iz oblasti umjetnosti u smislu člana 12. stav (2) ove odluke u prethodnoj školskoj godini.

Član 8.

(Bodovanje po osnovu ostvarenog općeg uspjeha u prethodnoj školskoj godini osnovne ili srednje škole)

Po osnovu općeg uspjeha postignutog u prethodno završenom razredu osnovne ili srednje škole kandidatu pripadaju sljedeći bodovi:

- a) odličan uspjeh - prosjek 5,00.....10 bodova;
- b) odličan uspjeh - prosjek 4,90-4,99.....6 bodova;
- c) odličan uspjeh - prosjek 4,80-4,89.....3 boda.

Član 9.

(Bodovanje po osnovu ostvarenog općeg uspjeha u prethodnoj školskoj godini paralelne muzičke škole ili umjetničke škole)

Po osnovu općeg uspjeha postignutog u prethodno završenom razredu paralelne muzičke škole ili umjetničke škole kandidatu iz člana 2. stav (3) ove odluke pripadaju sljedeći bodovi:

- a) odličan uspjeh - prosjek 5,00.....10 bodova;
- b) odličan uspjeh - prosjek 4,80-4,99.....6 bodova;
- c) odličan uspjeh - prosjek 4,50-4,79.....3 boda.

Član 10.

(Bodovanje po osnovu uspjeha na takmičenjima iz predmeta iz nastavnog plana i programa)

(1) U skladu sa Pravilnikom o organizaciji takmičenja učenika srednjih škola ("Službene novine Tuzlanskog kantona", broj: 1/23 i 17/24) a na osnovu uspjeha iz predmeta iz nastavnog plana i programa, kandidatu iz člana 2. stav (2) ove odluke pripadaju sljedeći bodovi:

a) međunarodno takmičenje: postignuto prvo mjesto 20 bodova; drugo mjesto 17 bodova; treće mjesto 15 bodova; učešće 13 bodova

b) državno takmičenje: postignuto prvo mjesto 15 bodova; drugo mjesto 13 bodova; treće mjesto 10 bodova

c) federalno takmičenje: postignuto prvo mjesto 10 bodova; drugo mjesto 7 bodova; treće mjesto 5 bodova

d) kantonalno takmičenje: postignuto prvo mjesto 5 bodova; drugo mjesto 3 boda; treće mjesto 1 bod.

(2) Ukoliko je kandidat rezultate iz stava (1) ovog člana ostvario u sklopu tima (ekipno, u paru itd.) dodijelit će mu se polovina od predviđenog broja bodova za pojedinačni uspjeh iz stava (1) ovog člana.

Član 11.

(Bodovanje po osnovu uspjeha na takmičenjima iz predmeta iz nastavnog plana i programa umjetničke škole)

(1) Kandidatu iz člana 2. stav (3) ove odluke za ostvarene rezultate na federalnom takmičenju učenika i studenata muzike pripadaju sljedeći bodovi:

- a) postignuto prvo mjesto10 bodova;
- b) postignuto drugo mjesto7 bodova;
- c) postignuto treće mjesto5 bodova.

(2) Ukoliko je kandidat rezultate iz stava (1) ovog člana ostvario u sklopu tima (ekipno, u paru itd.) dodijelit će mu se polovina od predviđenog broja bodova za pojedinačni uspjeh iz stava (1) ovog člana.

Član 12.

(Bodovanje po osnovu ostvarenih rezultata iz drugih oblasti)

(1) Po osnovu osvojenih mjesta na takmičenjima iz oblasti tehničkog stvaralaštva, kulturno-umjetničkog stvaralaštva – književnih, likovnih, muzičkih i plesnih ostvarenja i iz oblasti sporta ili drugih oblasti koje se mogu dovesti u vezu sa obrazovanjem kandidatu iz člana 2. stav (2) ove odluke pripada po 1 bod za osvojeno neko od prva tri mjesta na takmičenjima na međunarodnom, državnom ili federalnom nivou, s tim da se kandidatu po ovom osnovu ne može dodijeliti više od 3 boda bez obzira na broj takmičenja na kojima je kandidat ostvario navedene rezultate.

(2) Po osnovu osvojenih mjesta na takmičenjima iz oblasti umjetnosti (književnih, likovnih, muzičkih, plesnih i glumačkih ostvarenja kandidatu iz člana 2. stav (3) ove odluke pripada 3 boda za osvojeno prvo mjesto, 2 boda za osvojeno drugo mjesto i 1 bod za osvojeno treće mjesto na takmičenjima na međunarodnom, državnom ili federalnom nivou iz oblasti muzike, s tim da se kandidatu po ovom osnovu ne može dodijeliti više od 5 bodova bez obzira na broj takmičenja na kojima je kandidat ostvario navedene rezultate.

(3) Ukoliko je kandidat rezultate iz stava (1) i (2) ovog člana ostvario u sklopu tima (ekipno, u paru itd.) dodijelit će mu se polovina od predviđenog broja bodova za pojedinačni uspjeh iz stava (1) ili (2) ovog člana.

Član 13.

(Prednost pri jednakom broju bodova)

(1) Ukoliko na rang listi dva ili više kandidata iz člana 2. stav (2) ove odluke ostvare isti broj bodova za dodjelu stipendija, prednost na rang listi ostvarit će kandidat koji je osvojio bolji rezultat/mjesto na višoj razini prema bodovanju iz člana 10. ove odluke.

(2) Ukoliko na rang listi dva ili više kandidata iz člana 2. stav (3) ove odluke ostvare isti broj bodova za dodjelu stipendija, prednost na rang listi ostvarit će kandidat koji je osvojio bolji rezultat/mjesto prema bodovanju iz člana 11. ove odluke, a ako se i na ovaj način ne bude mogla utvrditi prednost kandidata bit će to učinjeno na osnovu toga koji kandidat ima više ostvarenih boljih rezultata prema bodovanju iz člana 12. stav (2) ove odluke.

III - POSTUPAK DODJELE STIPENDIJA

Član 14.

(Donošenje odluke i raspisivanje konkursa)

(1) Odluku o raspisivanju konkursa za dodjelu stipendija posebno nadarenim redovnim učenicima srednjih škola u školskoj 2026/2027. godinu donosi Ministarstvo obrazovanja i nauke Tuzlanskog kantona (u daljem tekstu: Ministarstvo).

(2) Tekst konkursa i obrazac prijave na konkurs utvrđuje Ministarstvo.

(3) Konkurs obavezno sadrži sljedeće podatke:

- a) naziv organa koji objavljuje konkurs,
- b) adresu organa kojem se zahtjevi podnose,
- c) uslovi i kriteriji za dodjelu stipendije,
- d) dokazi koje kandidati prilažu uz prijavu na konkurs,
- e) rokovi za prijavu na konkurs,
- f) prava i obaveze kandidata,
- g) način isplate sredstava i
- h) druge eventualno potrebne podatke.

(4) Tekst konkursa se objavljuje na zvaničnoj internet stranici Ministarstva, od kada počinje teći rok za predaju dokumentacije i isti prosljeđuje školama radi isticanja teksta konkursa na oglasnoj ploči za učenike.

Član 15.

(Prijava na konkurs)

(1) Prijave na konkurs sa potrebnom dokumentacijom, na jednom od službenih jezika u BiH, podnose se Ministarstvu, u roku od 15 dana od dana objavljivanja konkursa na internet stranici Ministarstva.

(2) Prijava na konkurs se vrši putem prijavnog obrasca koji je sastavni dio ove odluke (prilog I), koji se može preuzeti na Internet stranici Ministarstva i u službenim prostorijama Ministarstva i to na način da kandidat mora naznačiti za koju vrstu stipendije konkuriše, a ukoliko to propusti učiniti bit će svrstan u skupinu kandidata kojima se dodjeljuje stipendija iz člana 2. stav (2) ove odluke te ukoliko prijava bude sadržavala dokumentaciju kojom se dokazuje ispunjavanje uslova za dodjelu stipendije iz člana 2. stav (3) ove odluke ista neće biti uzeta u razmatranje.

(3) Kandidat je uz popunjen prijavni obrazac obavezan dostaviti i:

- a) uvjerenje o statusu redovnog učenika srednje škole u školskoj 2026/2027. godini (original ili ovjerena kopija),
- b) uvjerenje o statusu redovnog učenika srednje umjetničke škole u školskoj 2026/2027. godini (original ili ovjerena kopija), za kandidate iz člana 2. stav (3) ove odluke,
- c) uvjerenje o državljanstvu (original ili ovjerena kopija),
- d) svjedočanstvo o prethodno završenom razredu osnovne ili srednje škole (ovjerena kopija) i/ili svjedočanstvo o prethodno završenom razredu paralelne muzičke škole ili srednje umjetničke za kandidate iz člana 2. stav (3) ove odluke (ovjerena kopija) ili uvezana ovjerena kopija stranica učeničke knjižice na kojima se nalaze opći podaci o kandidatu i podaci o uspjehu postignutom u prethodnoj školskoj godini,
- e) ovjerena izjava roditelja/staratelja kandidata ili punoljetnog kandidata da kandidat ne koristi ili nije dobitnik neke druge stipendije gdje je izvor finansija za stipendiju Budžet Tuzlanskog kantona,

(4) Kandidat je uz popunjen prijavni obrazac i obaveznu dokumentaciju dužan dostaviti posebnu dokumentaciju kojom dokazuje uspjehe i rezultate iz određene oblasti za koju je posebno nadaren (uvjerenja, potvrde, certifikate izdate od strane organizatora takmičenja, s tim da učenici koji su rezultate ostvarili kao dio školske ekipe trebaju dostaviti i potvrdu škole da su bili članovi ekipe koja je ostvarila određeni rezultat) kako je navedeno u članu 7. ove Odluke.

(5) Sva dokumentacija koja se dostavlja uz prijavni obrazac mora biti u originalu ili ovjerenj fotografiji, te na jednom od jezika u službenoj upotrebi u Bosni i Hercegovini (uz dokument izdat na stranom jeziku potrebno je dostaviti i originalni prijevod sudskog tumača ili ovjerenu kopiju prijevoda).

Član 16.

(Imenovanje i sastav Komisije)

(1) Konkursnu proceduru provodi Komisija koju imenuje ministar obrazovanja i nauke Tuzlanskog kantona (u daljem tekstu: ministar), u roku od 15 dana od dana objave konkursa.

(2) Komisija ima tri člana, imenovana ispred Ministarstva.

(3) Komisija za svoj rad odgovara Ministru.

(4) Članovi Komisije ne mogu biti lica čiji članovi porodičnog domaćinstva učestvuju u postupku za dodjelu sredstava po ovoj odluci.

(5) Komisija je dužna razmotriti prijave u pogledu blagovremenosti i potpunosti, utvrditi broj bodova po svakom od osnova i najkasnije u roku od 15 dana od isteka roka za prijave na konkurs sačiniti jedinstvene rang liste i iste objaviti na internet stranici Ministarstva.

(6) Rang liste kandidata obavezno sadrže:

- a) prezime, ime jednog roditelja i ime kandidata,
- b) broj bodova po svakom od utvrđenih osnova,
- c) ukupan broj bodova po svim osnovama i
- d) pouku o pravnom lijeku sa tačno naznačenim rokom za ulaganje prigovora.

(7) Neblagovremene i nepotpune prijave Komisija neće uzimati u razmatranje, a prijavljeni kandidati o razlozima nepostupanja po zaprimljenim prijavama obavještavaju se isticanjem posebnih lista.

(8) Ukoliko Komisija nakon razmatranja prijave i dokumentacije priložene uz istu utvrdi da

kandidat ne ispunjava uslove iz člana 6. ove odluke, prijavu kandidata će odbiti, a prijavljeni kandidat o razlozima odbijanja prijave se obavještava putem lista iz stava (7) ovog člana.

Član 17.

(Postupak po prigovoru i donošenje konačne rang liste)

(1) Na liste iz člana 15. stavovi (5) i (7) ove odluke, nezadovoljni kandidati mogu podnijeti prigovor u roku od 3 dana od dana objavljivanja listi na internet stranici Ministarstva.

(2) Prigovor se podnosi Ministarstvu u pisanoj formi.

(3) O podnesenim prigovorima odlučuje ministar u roku od 5 dana od dana isteka roka za podnošenje prigovora.

(4) Nakon okončanja postupka po prigovorima konačne rang liste kandidata utvrđuje ministar.

Član 18.

(Ugovor o stipendiranju)

(1) Na osnovu konačnih rang listi, ministar sa roditeljem/starateljem kandidata ili punoljetnim kandidatom, zaključuje ugovor o stipendiranju, kojim se bliže uređuju međusobna prava i obaveze.

(2) Ugovor iz stava (1) ovog člana zaključuje se u roku od 10 dana od dana isticanja konačnih rang listi na internet stranici Ministarstva.

(3) Ukoliko roditelj/staratelj kandidata ili punoljetni kandidat, u roku iz stava (1) ovog člana ne potpiše ugovor bez opravdanog razloga u pisanoj formi, kandidat gubi pravo na dodjelu stipendije, a stipendija se dodjeljuje prvom sljedećem kandidatu sa rang liste kandidata koji nije ostvario pravo na dodjelu stipendije.

IV - NAČIN ISPLATE STIPENDIJA

Član 19.

(Isplata stipendije)

(1) Stipendija se isplaćuje u najviše četiri jednake mjesečne rate.

(2) Isplata stipendija vrši se putem štedne knjižice ili računa korisnika stipendije, otvorenog kod banke na području Federacije Bosne i Hercegovine.

(3) Evidenciju o korisnicima stipendija vodi Ministarstvo.

Član 20.

(Gubitak prava na stipendiranje)

(1) Korisnik stipendije gubi pravo na dalju isplatu stipendije, ako u toku školske godine:

a) napusti redovno školovanje,

b) bude mu izrečena disciplinska mjera isključenja iz škole,

c) po nekom drugom osnovu prestane mu status redovnog učenika,

d) ako se naknadno utvrdi da su prilikom prijave na konkurs iznesene netačne činjenice na osnovu kojih mu je stipendija dodijeljena.

(2) Korisnik stipendije je dužan u roku od 30 dana od nastupanja okolnosti iz stava (1) tačka a), b) i c) ovog člana, obavijestiti davaoca stipendije o tim okolnostima.

V – ZAVRŠNE ODREDBE

Član 21.

Ova odluka stupa na snagu danom donošenja, a biće objavljena u „Službenim novinama Tuzlanskog kantona“.

BOSNA I HERCEGOVINA

Federacija Bosne i Hercegovine

TUZLANSKI KANTON

Ministarstvo obrazovanja i nauke

Broj: 10/1-11-028454/26

Tuzla, 29.09.2026. godine

MINISTAR

Dr. sc. Ahmed Omerović, v. r.